

Xuti

Nuhemi meta Xuti

¹ Merikitsi, meripaiti 'itsikate mete'aitakaku miki kwieyaritsie, haakaxa kaniutaweni. Xewiti tewi Wereni kiekame Kura kwieyaritsie heyeyaka Muhawi kwieyaritsie peta'a, yi'ia meta yuniwema yuhutame warawititi.*

² Miki 'uki 'Erimereki pititewakai, 'iyayata Nuhemi pititewakai, niwemamata Makiruni meta Kirihuni. Miki yunaiti 'Epirata kiekatari mepihikitikai, Wereni kiekatari Kura kwieyaritsie. Kepauka Muhawi kwieyaritsie memeta'axia, mana mepiyuhayewaxi.

³ Matsi 'Erimereki kaniumini Nuhemi kinaya. Hiki miki yuxaita kaniuyuhayewa yuniwema yuhutame wahamatia.

⁴ Miki yuhutati mekaniutineneike 'ukarawetsixi muhawitsixi mekaniwarutiwitini. Xewiti 'Uripa pititewakai, xewitita Xuti. Tamamata wiyari mana metiteti,

⁵ hiki mikita mekaniukwini Makiruni meta Kirihuni. Nuhemi wiuratiti yuxaita puyuhayewaxi niwemama me'ukwiku.

⁶ Hiki Yawé yuteiterima hekwameki kaniwaparewiekaitini tixuaweriyati 'ikwaite. Hiki Nuhemi mipai retimaika kaniyukuha'aritiaani yumu'e'ema waranuwitinike Muhawi yeyanike.

⁷ Hiki kaneyani yumu'e'ema yuhutame warawititi hakewa meripaiti mekienatikai.

* **1:1 1:1** Keneuxeiya **'Its 2:16.**

Yunaiti mekanekine huyeta, Kura kwieyaritsie haneme 'utia.

⁸ Hiki Nuhemi mipai katiniwarutahiawe yumu'e'ema:

—Neuxei, yuxexuiti yukie xekeneutayeixia yumaamama wahetsia. Yawé 'aixia ketixexeiyani kexemitewanaki'eriekai memukwi, wahetsie kexemitewiyakai, yaxeikiata kexemitenenaki'eriekai ne.

⁹ Yawé waikawa kexeheparewieka hekwameki 'aixia 'anemeki xemitiwikieniki.

Hiki kaniwaruti'itseni. Perutsi mu'e'emama kwinimieme meyuhiwerieti meputitsuanakai

¹⁰ mipai me'utiyuati:

—Hawaiki. Tame tepiyehu 'ahamatia 'akiekarit-sie.

¹¹ Nuhemi mipai katiniwaruta'eiya:

—Neuxei neniwema, yukie xekenehu. ¿Titayarikuta nehamatia xetekiniku? Tawariri nepikatinieni memixetiwitiniki.

¹² Xekenehu yukie, neniwema. Xekeneuhuni. Neri nepi'ukaratsi nepitseie, tawariri nepikayiwe nemitiwikieniki. Xika neyiwenike, 'iki tikaritsie nepitiwikienikeyu nemitiniweniki,

¹³ ¿xemeta xeteyiwawe xemiwakwewieniki mewawerekaku? ¿Xeteyuwairiya xekawikieti xemiyuhayewaniki wakimana? Hawaiki, neniwema. Waikawa matsi ne nepitiuka'eniwa kexeme. Yawé waikawa pinetsi'anayewaya.

¹⁴ Tawarita matsi karima mekaniutihi-wakaitini, kwi meyuheiwerieti. Hiki 'Uripa yumu'e kaniutateutiani 'i'itseka. Peru Xuti hamatiana puyuhayewaxi.

¹⁵ Nuhemi mipai kaniutayini:

—Neuxei, nemu'e. 'Awixi yukie petia,
yukakaiyarixi wahetsia. 'Ekita hepaına kenemie.

16 Xuti mipai katinita'eiya:

—Pepikanetsini'aka nemiyemieki, 'axaita
nemimatsiku'eirieniki.

»Ne 'ahamatia nepiyemie, hakewa pemetia.

Hakewa pemekani, neta mana nepekani.

'Ateiterima, neteiterima mepihikitini.

'Akakaiyari pinekakaiyaritini.

17 Hakewa pememini, manata ne nepemini,

Mana nepekateukieni.

Yawé kenetsihe'uximatiani xika nemetsi-
heku'eirieni

xika tixaiti kataretaxirixiani,

kamiyatiti».

18 Nuhemi 'uyi'iwiyaka yuheyemeki
miyuwairiyakaiki Xuti 'enuweiyake, tawariri
pika'ita'imaiyaxi.

19 Hiki, yuhutati 'ukarawetsixi mekanekine
huyeta meheta'axianike Wereni paiti.
Me'u'axiaku, waikawa niuki kaniutixuawere
wahepaitsita, naitsarie kiekaritsie.

'Ukarawetsixi mipai mekateniyuku'iwwawiyakaitini:

—ǂ'iki Nuhemi katihiki?

20 Nuhemi mipai katiniwarutahiawe:

—Nuhemi† xepikanete'uteriwani. Marara‡
pitari xekeneteneuteriwani. Naimekimitirikaie
nehatsiwime pinetsi'ayeitia.

21 »Kepauka nemetia yemeki nepihinekai
nepiyiwekai,

† 1:20 1:20 Nuhemi hepirayuki witsimi'ane makaka panuyine.

‡ 1:20 1:20 Marara hepirayuki matsiwi panuyine.

matsi Yawé pinetsihakunuitia nexaitame,
 naime netiunawairieka.
 Titayari Nuhemi xenete'uteriwani
 Yawé 'uximatiarika netsi'upitiaka,§
 temawierika pinetsi'unawairi
 Naimekimitirikaiye».

²² Mipai Nuhemi katininuani yukiekaritsie,
 Muhawi kwieyaritsie heyeyaka, yumu'e hawititi
 Xuti Muhawi tewiyari. Kepauka memu'axia
 Wereni, tsewara 'itsanariyari putsutiariekai.

2

Xuti Wuhutsi kemi tiukaxei

¹ Nuhemi kinaya 'iwaya yatewa 'apuyeikakai,
 Wuhutsi titewati, 'Erimereki 'iwayatiti. Miki
 waikawa pirexeiyakai, teiteri mepi'eniekai.

² Hiki Xuti Muhawi tewiyari Nuhemi mipai ka-
 tiniutahiawe:

—Keneneupitia nemiti pepenamieki
 mira'itsanat netsie, meyukuhayeikawa xeime
 'aixia tiuka'iyarime hetsia.

Hiki mu'eya mipai katinita'eiya:

—Kenemie, neniwe.

³ Hiki Xuti kaneyani tsewara 'imiariyari
 hekuteixike mira'itsanat netsie, 'itsanamete
 wa'utima. 'Atsikaimaiti kemi'ane 'itsanaripa
 meuyeneniekai, Wuhutsi 'itsanaripa
 kaneuyeneni, 'Erimereki 'iwaya hetsia.

⁴ Hiki 'itsanamete mete'uximayakaku, kaninu-
 ani Wuhutsi Wereni heyeyaka, te'uximayatamete
 kaniwarutawairitiani:

§ 1:21 1:21 Yawé 'uximatiarika netsi'upitiaka. Ya Xika Yawé
 ya'utaineni nehepaitisita kenemitiuyuri.

—Yawé xehamatia ke'uyeikani.

Miki mipai mekatenita'eiya:

—'Ekita, 'ahamatia ke'uyeikani.

⁵ Te'uximayatamete tiwa'aitiwame Wuhutsi mipai katiniuta'iwawiya:

—¿Miki 'ukaratsi kepaiki pira'iya?

⁶ Miki mipai katinita'eiya:

—'Iki 'ukaratsi, Muhawi tewiyari pihiki, Nuhemi hamatia meyetia.

⁷ Miki puyutawau kename neke'ipitiani mitikuteixiniki xuruku 'utia, 'itsanamete memikuhayeikawa. Ximeripaititi pikatitahayewawe 'amitinuatsie 'ena. Hikike kani'uxipieka 'etsiwa 'etipiwaritia.*

⁸ Hikiki Wuhutsi, Xuti mipai katiniutahiawe:

—Neniwe keneneu'eni. Hipame wa'itsanaripa pepikatiteixineni. 'Ateewa paiti pepikaheyeikani. 'Ahepai 'ukarawetsixi meminetsiparewie wahamatia keneyuhayewani.

⁹ Kene'a'iwaiya hakewa teme'uwa tema'itsanatiwetsie, keniwakuweiyaneni 'a'iwama. 'Itsanamete 'ukitsi mipai nepitiwarahiawe memikamatsi'uximatiakaki. Kepauka pemeuharimikini, hakewa haa meti'u, keneharimie, te'uximayatamete wahetsia.

¹⁰ Hikiki Xuti 'utihiximakeka kwiepa, mipai kani-utayini:

—Karitsi 'aixia pepinetimate penetsi'uxeiyaka, ne 'ateewa paiti nekiekametime.

¹¹ Wuhutsi kanita'eiya:

* **2:7 2:7** Hikike kani'uxipieka 'etsiwa 'etipiwaritia hepirayuki pikwaniwe.

—Mipai nepitimarie, naime kepemitiuyuri 'amu'e hetsiemieme kepauka 'akina mumi, kepemitiwaruku'eiri 'apaapama, miki kwieyaritsie hakewa pemetinuiwaxi, hiki miki kiekariyaritsie peheyeyaka 'ena pepunua pekahemarieti.

¹² Yawé kematiyetuirieka kepemitiuyuriki. Yawé, 'ixaheritsixi wakakaiyari, hetsia pekaninuani mimatsi'iwianiki, waikawa kematsiparewieka.

¹³ Mipai kaniutayini:

—Xikatsi tiywenike nematsinaki'atsitiaka, neti'aitiwame. 'Eki pepinetsinitia, 'aixia penetixeiyati pepinetsikihawe, tsepa nekamati'a'uximayatsiriwame.

¹⁴ Hiki Wuhutsi mipai katinitahiawe kepauka mitikwanieka:

—'Enapai kenayaka, kenayuka'ikwaitiaka tumati 'ipinariyariki 'apa kenekwaka.

Kepauka Xuti te'uximayatamete wahamatia 'amutaya, Wuhutsi pitaxatia tsewara xarikiyari. Hiki miki katiniukwani, kaniutahuxani 'akuxita kaniuyuhayewa.

¹⁵ Kepauka miki manukuke reuteiximieka, miki te'i'uximayatsiriwamete mipai katiniwaruta'aitiani:

—Kepauka 'iki xuruku 'utia mititeixineni, xepika'itewiyatsitiaka.

¹⁶ Matsi manahiatika xexuime xekenekuhayeikiriwani, para miki mikuteixiki, xepika'itate'ani.

17 Meriki Xuti tikuteixiti kaniukutaikaiyarieni. Hikita tsewara mikuteixixi kaniutikatse. Xeitewiyari kiruyari paimeme payexiri.†

18 Hiki hetiti kaneyani kiekaritsie. Mu'eya kanixeiya kepaimeme matikikai. Xuti yumu'e katiniyetuirieni mitiuyuhayewakai mitiukwaitsie mieme 'utahuxaku.

19 Hiki mu'eya mipai katinita'iwawiya:

—Hakewa hiki tsewara pepekuteixixi, hakewa pepireta'uximayataxi, 'aixia ke'itiarieka tewi 'aixia mimarexei.

Hiki Xuti yumu'e katiniutaxatiani kemi'ane hetsia mireta'uximayataxi. Mipai katinitahiawe:

—Tewi hetsia hiki nemireta'uximayataxi, Wuhutsi katinitewaka.

20 Nuhemi yumu'e mipai katiniutahiawe:

—Yawé 'aixia keheiyurieka. Yawé pikatihayewa tahetsie tiwiyati yunaki'eriya tatsipitiati, memayeneniere wahetsiemieme meta memukwi. Miki tewi pita'iwa hurawa. Miki pihiritiarie mitatsiparewieniki.

21 Xuti Muhawi tewiyari mipai kaniutayini:

—Mipaita pinerahiawekai, 'ena keneu'ahayewa nete'uximayatsiriwamete wahamatia, kepaukake 'itsanari naime temikinini.

22 Nuhemi mipai katinitahiawe:

—Neniwe, matikunanake wahamatia pemuyeikaniki, para hipame xaitsie pemikatiware'uximayatsiriekaki.

23 'Ayumieme Xuti mana kaniuyuhayewa Wuhutsi te'uximayatsiriwametemama 'ukari wahetsia, mikuteixiniki kepaukake memikini

† 2:17 2:17 Xeitewiyari kiruyari hepirayuki xe'epayari panuyine.

me'itsanatiweti tsewara meta tiriku. Mexikuxi, yumu'e hetsia 'ukatei.

3

Xuti meta Wuhutsi kememiteyukaxei

¹ Merikitsi mu'eya Nuhemi mipai katinitahiawe:

—Neuxei neniwe. Xiari peuyewetse nemimatsikuwawirieniki hakewa pemekani 'aixia 'anemeki tixaiti pekareuyehiati.

² Matsiti Wuhutsi te'uximayatsiriwamete wahetsia pepeta'axe, miki pita'iwa. Miki, 'iki tikariyaritsie mana penuani tsewara matikatsiwatsie.

³ Keneti'iwa, witsimu'ia keneu'atawirieka meta 'akemari 'aixia mi'anene kenanakatixiaka. Kenemie tsewara matikatsiwatsie. Pepikaheyuhekiatani kapa mipai retimaniki, kepaukake miretahayewa rekwati meta re'iet'i 'anake.

⁴ Kepaukari meyemie hekahunike, kene'a'iwiya hakewa mekahuni. 'Anake pepeyemie, 'ikayatsie pe'enuku'ikaripieme, mana pepekahuni. Hiki miki yapetayini kepemitiyurieni.

⁵ Xuti mipai katinita'eiya:

—Yanepitiyurieni naime kepeminerahiawe.

⁶ Heyaka mirati'uximayatsiwatsie yapitikatia mu'eya kemitita'aitiakai.

⁷ Wuhutsi tiukwaka meta tiu'ieka, puyutemawiekai. Hiki kaneyani hekahunike tsewara matixei'ie warita. Hiki Xuti 'arikeke 'aniari 'umieti kanaye'ani hetsiana, 'ikayatia 'enuku'ikaripieka mana kaniukahuni.

⁸ Hiki Wuhutsi tikari hixiapa kananutaniere, ta'aurie hawenike, 'ana 'ukaratsi puxei manuka'ikatsie 'ukaikame.

⁹ Mipai katinita'iwawiya:

—¿Kepaiki pepiyiane?

—Ne Xuti nepiyiane, mati'uximayatsiriwame. 'A'ikari kitsimeyari keneneukaketia,* 'eki hiritiarika pepexeya pemnetsitiwitiniki, tatiiriyama 'anuiwaritsie miemete memakineki temi'iwamarixiki.

¹⁰ —Neniwe Yawé kematsi'iwiyani. Hiki hekwameki kepemitiuyuri, pepi'ahekiata kepemitiwiya 'amu'e hetsie, yaxeikiata 'akinatikaitsie temari pemikawakuwauneki, memikatehexeya yatini memitehexeya.

¹¹ Hiki neniwe pepikaheumaka. Tita pemireuyehiwa naime yanepitiyurieni. Yunaiti neteiterima† yamepitemate 'eki 'ukaratsi 'iniari kepemitihihi yapemitikamieki.

¹² 'Aixiatsi kani'aneni temi'iwamarixiki perutsi matsi 'akuxi xewiti 'apuyeika kemi'ane mihiritiarie para mimatsiparewieniki.

¹³ Hiki tikaritsie 'ena keneu'ahayewa ximerike pepiyemie. Xika miki yara'eriwani, 'aixia kani'aneni yaketiuyurieni. Peru xika yakara'eriwani yamitiyurieniki, kaniyuritini Yawé mayeniereki, yuriki ne nepiyihiritia nepimatsiparewieni. Keneukaniri mana ximerikeri pekaniyemieni.

* **3:9 3:9** 'A'ikari kitsimeyari keneneukaketia. 'Ikiri mipai pituhekarixi mitiwitiniki. † **3:11 3:11** Yunaiti neteiterima hepirayuki panuyine Yunaiti neteiterima wakitenie.

14 Hiki manuka'ikatsie 'ukaiti kaniukatari-yarieni, tuxakita 'anukukeka kaneyani, mipai mirehiawekaiki: «Xewiti mikaretimaniki kename 'ukaratsi 'ena hekuyeixia mirati'uritiretsie».

15 Hikita Wuhutsi mipai katinitahiawe:

—'Axikuri keneutawera, 'aixia ketinewiyani.

Xuti mipai katiniuyurieni, kanitawera yuxikuri. Mana kanikayatsirieni tsewara xeitewiyari kiruyari.‡ 'Itititaku kiekaritsie kaneyani.

16 Hiki kepauka Xuti meta'a yumu'e hetsia, kanita'iwawiya:

—Keperepariari, neniwe

Xuti naime pititaxatia, tewi hetsiena mieme kemireyuri,

17 mipaita kaniutayini:

—'Iki tsewara pinetsihetitia xeitewiyari kiruyari, mipai nerahiaweti: “'Aixia pika'ane pe'amaweti pemeumieni 'amu'e hetsia”.

18 Hiki Nuhemi mipai katinitahiawe:

—Neuxei neniwe, 'akuxi keneta'ikwewani ketiyini. Miki tewi yumexitiati pikatihayewa, 'aixia tiyurienike hiki tukariyaritsie.

4

Xuti meta Wuhutsi kememiteyutiwiti

1 Hiki Wuhutsi heyaka, kiekari kitenie kanayerini. Mana puyetia 'iwaya mihiritiariakai hetsiena mieme miraxaxataakai.

Wuhutsi mipai katinitahiawe:

—Kenaye'a ne'iwa, 'ena kenayexi.

Miki tewi mana 'uyaka mana kanayerini.

‡ 3:15 3:15 xeitewiyari kiruyari. Hepirayuki meta wixarikaki 'ataxewime kakuniyari panuyine.

2 Hiki Wuhutsi 'ukirawetsixi tamamata
kaniwaruta'inieni kiekaritsie, mipaita
katiniwarutahiawe:

—'Ena xekenayaxi.

Miki mana mekanayaxe.

3 Wuhutsi yu'iwa mihiritiarie mipai
katinitahiawe:

—Nuhemi, Muhawi kwieyaritsie heyeyaka,
kwie ta'iwa miku'eiri 'Erimereki kanituamikini.

4 Mipai netimaiti kename heuyewetse,
nematitaxatianiki 'iki hepaitsita, nemetsi'aitiati
peminaneniki, 'iki yunaime wahixie 'ukirawetsixi
kiekatari, meta hipame wahixie. Xika 'iki
kwie penanaimiki, yaketineuyuri. Mexika
'eki yapekatikayeimiki 'iki kwie hepaitsita,
yakeneutayiki, mipai ne nemitimaikaki. Xewiti
tawariri pumawe heitserie mexeiya piinieya
mayaniki, 'eki xeikia. Neta 'a'utima heitserie
nepexeiya.

Miki kanita'eiya:

—Ne nepiyianeni nemirayukatuani.

5 Matsi Wuhutsi naime katinitahekiatiani:

—Kepauka Nuhemi kwieya 'apiini
pemayeitiani, 'anata Xuti pepitanaki'erieni
Muhawi tewiyari, wiura ta'iwa miku'eiri
mikwieyatikai, para temikahetitimaiyaniki
kename ta'iwa tipinieyatikai miki kwie.

6 'Iwaya mipai kaniutayini:

—Kamitsi nepikayiwe mipai nemitiyurieniki.
Xika mipai netiuyurieni, nepiinite naime
nepireuyehiani tita nemirexeiya neniwema
wahetsiemieme. 'Ekitsiari katini'ahetsietini, ne
mipai nemitiuyurieni. Nepikayiwe.

⁷ Hiki 'ana tukaritsie 'ixaheritsixi mipai mekateniuhukaitini, kepauka yupiini yukwie 'uku'eirieme tawarita minaneniki, yatini hekwameki minaneniki, 'ana tinaweme yukakai xeitapamieme mepiyukukweitiwakai, mipai mitimatsiikiniki kename 'ana 'inanai.

⁸ 'Ayumieme 'iwaya mihiritiariiekai kwie hepaitsita mipai yu'iwa Wuhutsi katiniutahiawe:

—'Eki keneunanai.

Yukakai panuyehinaxi.

⁹ Hiki Wuhutsi mipai kaniutayini 'ukirawetsixi yunaimie kiekatari wahixie, mipai 'utaiti:

—'Iki tukaritsie xeme xepihiki xemunenierixi, kename Nuhemi netiunanairi naime 'Erimereki tita mitipinieyatikai, Kirihuni meta Makiruni,

¹⁰ hikiri mipai xepitemaika kename ne'itiwiti Xuti Muhawi tewiyari Makiruni mi'iyayatikai, mikaheuyewautseniki Makiruni ta'iwa kemitihiikitikai, yaxeikiata piiniteya, xemikahetitimaiyaniki yunaiti 'iwamama, yaxeikiata kiekaritsie mikaheuyewautseniki kemtitewakai. Xemeri hiki xemunenierixi xepihiki.

¹¹ 'Ukirawetsixi meta yunaiti mana kiekari kite-nie memukutekai, mipai mekaniutiyuani:

—Tame temunenierixi tepihiki.

»Yawé yaxeikia yaketiuyurieni miki 'ukaratsi pemitiwitini hetsiemieme, kemitiwaruparewi Xakeri meta Reya nuiwari memukama wahapai, 'ixaheritsixi teiteriyari kememite'aki.

»'Ekita pematsiikiti peke'ayani 'Epirata mitiyetewatsie, meta waikawa pemariwati peke'ayani Wereni kiekariyaritsie.

¹² »Yawé 'iki 'uka hetsie kematsiyetuirieni 'anuiwarima Paretsi nuiwarimama hepai me'aneame, Tamaxi nu'aya Kura hetsiemieme meyexei».

Rawiri nuiwarimama

(Xut 4:18-22 - 1Kem 2:5-15, Mat 1:3-6, Ruk 3:31-33)

¹³ Hiki Wuhutsi Xuti kaniutiwitini. Kepauka memuyutiwiti, Yawé piwarupitia nunutsi memayexeyaki, hiki 'utihukataka 'ukitime kaniutiniweni.

¹⁴ 'Ukarawetsixi Nuhemi mipai mekatenikihawekaitini: «Yawé 'aixia ketikux-axatsiwani, 'axaitame mikamatsi'uku'eiriki, xeime matsiparewiwame pemexeyaki. Xeime mayexeyaki 'Ixaheri manukuhanaki.

¹⁵ 'Iki nunutsiki 'aixia pepi'itiarieka waikawa, hetsiena petiwiyati, 'amu'e mutiniwexiki. 'Amu'e waikawa mimatsinaki'erie, matsi ke'aniwema me'atahutati».

¹⁶ Nuhemi nunutsi kananutuni, kaneikukweni, kaniyihiritiani mitaweriyaki.

¹⁷ 'Ahurawatari mipai mekaniutiyanekaitini: «Nuhemi nunutsi kanexeyani». 'Uweri mekaten-iteriwa. 'Iki 'Itsahi paapaya kanayani, Rawiri paapaya.

¹⁸ 'Iki Paretsi pinuiwarieya:

Paretsi, Ketsiruni pipapayatikai.

¹⁹ Ketsiruni, Xami pipapayatikai.

Xami, 'Aminarawi pipapayatikai.

²⁰ 'Aminarawi, Nahatsuni pipapayatikai.

Nahatsuni, Tsarimuni pipapayatikai.

²¹ Tsarimuni, Wuhutsi pipapayatikai.

Wuhutsi, 'Uweri pīpaapayatikai.
²² 'Uweri, 'Itsahi pīpaapayatikai.
'Itsahi, Rawiri pīpaapayatikai.

**KAKAFYARI NIUKIEYA XAPAYARI
WIXARIKAKI**
**The Holy Bible in the in Huichol language of Mexico,
2020 edition**
**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3